

四庫全書

史部

欽定四庫全書

金史卷十八

元中書右丞相總裁托克托等修

本紀第十八

哀宗下

九月戊寅朔詔減親衛軍己丑軍士殺鄭門守者出奔
壬辰起上黨公張開及臨淄郡王王義深廣平郡王范
成為元帥以前御史大夫完顏哈昭權參知政事乙未

以榜召民賣放下年軍需錢上戶田租如之辛丑夜大雷工部尚書富聶遜震死閏月戊申朔遣使以鐵券一虎符六大信牌十織金龍丈御衣一玉魚帶一弓矢二賜究王完顏用安其父母妻皆贈封之又以世襲宣命十郡王宣命十玉兔鶻帶十付用安其同盟可賜者即賜之辛亥遣張開幹色辛劉益高顯率步軍護陳留通許糧道罷貧民進獻糧戊午招鄉導己未有箭射入宮中書姦臣姓名兩日再得之辛酉再括京城粟以御史

大夫哈昭點檢圖克坦伯嘉等主之丙寅括粟使者兵馬都總領完顏玖珠以粟有蓬稗杖殺孝婦于省門十月以前司農卿李煥飛語詔左丞李蹊戶部侍郎楊慥繫獄將以軍儲失計坐罪俄蹊慥並除名而止籍慥家貲煥遂權戶部尚書尋赦殘欠糧其應以糧事繫者皆釋之詔徵諸道軍期以十二月一日入援十一月丁未朔賜貧民粥平章政事侯摯致仕左司郎中錫默愛實以言事忤近侍送有司尋釋之己酉衛州軍校白晝取

豐備倉米壬子京城人相食癸丑詔曹門宋門放士民
出就食壬戌召諸將相入議事充王用安率兵至徐州
元帥王德全閉城不納會劉安國與宿帥重僧努引兵
入援至臨渙用安使人劫殺之攻徐州久不能下退保
漣水制使因世英以用安不赴援還至宿州西遇大元
兵死之丙寅河解元帥權興寶軍節度使趙偉襲據陝
州以叛殺行省阿布哈努色爾以下凡二十一人誣阿
布哈努色爾等反狀以聞上知其寃不能直其事就授

偉元帥左監軍兼西安軍節度使行總帥府事偉尋亦歸北十二月丙子朔以事勢危急遣近侍即白華問計華對以紀季以鄴入齊之義遂以為右司郎中甲申詔議親出乙酉再議於大慶殿上欲以官努高顯劉益為元帥不果是日除拜扈從及留守京城官以右丞相樞密使兼左副元帥薩布平章政事權樞密使兼右副元帥博索右副元帥兼樞密副使權參知政事恩楚兵部尚書權尚書左丞李蹊元帥左監軍行總帥府事圖克

坦伯嘉等率軍扈從參知政事兼樞密院副使完顏納
紳樞密副使兼知開封府權參知政事薩尼雅布裏城
四面都總領戶部尚書完顏珠赫外城東面元帥博斯
呼南面元帥珠嘉耀珠西面元帥崔立北面元帥富珠
哩邁努等留守除拜既定以京城付之擢魏璠為翰林
脩撰如鄧州招武仙入援丁亥上御端門發府庫及兩
府器皿宮人衣服賜將士戊戌官努阿里哈謀立荆王
不果朝廷知其謀置不問庚子上發南京與太后皇后

諸妃別大慟行次公主苑太后遣中官持米肉徧犒軍
士辛丑至開陽門外麾百官退詔諭戍兵曰社稷宗廟
在此汝等壯士也毋以不預進發之數便謂無功若保
守無虞將來功賞顧豈在戰士下聞者皆灑泣是日鞏
昌元帥完顏呼沙呼至自金昌為上言京西三百里之
間無井竈不可往東行之議遂決以為尚書右丞從行
遂次陳留壬寅次杞縣癸卯次黃城丞相完顏薩布之
子安春有罪伏誅甲辰次黃陵岡乙巳諸將請幸河朔

從之

二年正月丙午朔濟河北風大作後軍不克濟丁未大元兵追擊于南岸元帥完顏珠爾賀德希死之建威都尉完顏額埒春降己酉上哭祭戰死士于北岸皆贈官斬額埒春二弟以殉赦河朔招集兵糧議取衛州元帥富察官努將忠孝軍千人東面元帥高顯果毅都尉鈕祜祿耀珠領軍萬人為前鋒至蒲城庚戌上次漚麻岡平章政事博索元帥哈薩喇烏達布繼至辛亥博索引

兵攻衛州不克乙卯聞大元兵自河南渡河至衛之西
南遂退師丁巳戰于白公廟博索敗績棄軍東遁元帥
劉益上黨公張開亦遁並為民家所殺益部曲王全降
戊午上進次蒲城復還魏樓村李辛自汴京出奔伏誅
己未上以博索謀夜棄六軍渡河與副元帥和爾和六
七人走歸德庚申諸軍始知上已往遂潰辛酉司農大
卿富察世達元帥完顏呼圖出歸德西門奉迎上入歸
德赦在府囚軍民普覃一官賜進士終場王輔以下十

六人出身遣奉御珠嘉塔克實布后弟圖克坦肆喜往
汴京奉迎兩宮博索還自蒲城聚兵於大橋不敢入壬
戌遣使召博索數其罪下之獄籍其家財以賜將士曰
汝輩宜竭忠力毋如斯人誤國人予金一兩七日博索
及其子呼圖哩皆死獄中右丞相薩布致仕右丞完顏
呼沙呼行省事于徐州官努再請率兵北渡紐勒歡不
可遣歸德知府行戶部尚書富察世達都轉運使張俊
民如陳蔡取糧以元帥李琦王壁護之戊辰安平都尉

京城西面元帥崔立與其黨韓鐸藥安國等舉兵為亂
殺參知政事完顏納新樞密副使完顏薩尼雅布勒兵
入見太后傳令立衛王子從恪為梁王監國即自為太
師軍馬都元帥尚書令尋自稱左丞相都元帥尚書令
鄭王弟倚平章政事侃殿前都點檢其黨富珠哩察罕
御史中丞韓鐸副元帥兼知開封府折希顏藥安國漳
軍努完顏哈達並元帥師肅左右司郎中賈良兵部郎
中兼右司都事又署工部尚書溫特赫額實吏部侍郎

劉仲周並為參知政事宣徽使鄂屯舜卿為尚書左丞
戶部侍郎張正倫為尚書右丞左右司都事張節為左
右司郎中尚書省掾元好問為左右司員外郎都轉運
知事王天祺懷州同知康瑯並為左右司都事開封判
官李禹翼棄官去戶部主事鄭著召不起是日右副點
檢溫都阿里左右司員外郎聶天驥御史大夫費摩阿
古岱諫議大夫左右司郎中烏克遜納新左副點檢完
顏阿薩爾奉御莽格講議富察琦並死之遂送欵大元

軍前癸酉大元將蘇布特進兵汴京甲戌立閱隨駕官屬軍民子女於省署及禁民間嫁娶括京城財兩宮值變不果行塔克實布以其父耀珠肆喜以其妻奪門而出至歸德上怒二人皆斬於市乙亥遣右宣徽提點近侍局事伊喇寧古如徐州相地形察倉庫虛實白華如鄧州召兵二月丙子朔魚山張璪殺元帥完顏呼圖行省呼沙呼自率兵討之會從宜嚴祿誅璪乃還括城中糧知歸德府事實嘉紐勒歡為樞密副使權參知政事

留元帥官努忠孝軍四百五十人都尉馬用軍二百八十餘人發餘軍赴宿徐陳三州就糧三月乙丑實嘉紐勒歡乞盡散衛兵出城就食官努私與國用安謀邀上幸海州不從蔡帥烏庫哩鎬以糧四百餘斛至歸德表請臨幸上遣學士烏庫哩布希以幸蔡之意諭其州人戊辰官努以忠孝軍為亂殺馬用遂殺尚書左丞李蹊參知政事實嘉紐勒歡點檢圖克坦長樂從官右丞已下三百餘人上赦官努暴紐勒歡罪狀以官努為樞密

副使權參知政事左右司郎中張天綱為戶部侍郎權
參知政事已已官努真授參知政事兼左副元帥官努
以上居照碧堂禁諸臣無一人敢奏對者上日悲泣言
曰自古無不亡之國不死之主但恨朕不知用人致為
此奴所囚耳遂與內局令宋珪等謀誅官努夏四月壬
午徐州行省完顏呼沙呼執王德全并其子誅之及其
黨王琳楊瓚錫默延壽召經歷商瑀用之魚山從宜嚴
祿叛歸連水庚寅陳州都尉李順兒殺行省鈕祜祿納

新及招撫使劉天起送款于崔立張俊民李琦奔汴京
王壁還歸德癸巳崔立以梁王從恪荆王守純及宗室
男女五百餘人至青城皆及於難甲午兩宮北遷甲辰
鄧州節度使伊喇瑗以其城叛與白華俱亡入宋六月
己卯官努及其黨阿里哈博濟皆伏誅上御雙門赦忠
孝軍以安反側遂決策遷蔡詔蔡息陳穎各以兵來迓
中京留守權參政烏凌阿呼圖棄城奔蔡壬午中京破
留守兼便宜總帥強伸死之戊子召徐州行省完顏呼

沙呼赴行在所以穆延烏登代行省事郭恩為總帥兼
節度使辛卯上發歸德留元帥王壁守之壬辰次亳州
癸巳以亳州節度使王進同知節度使王賓徵民丁運
鐵甲糗糧留權參政張天綱董之就遷有功將士臨淄
郡王王義深據靈壁望口寨以叛遣近侍直長鈕祜祿
溫綽將徐宿兵討之義深敗走漣水入宋丙申亳州鎮
防軍崔富格殺守臣王賓等張天綱以便宜授富格節
度使罷運鐵甲糗糧州人乃安己亥上入蔡州詔尚書

省為書召武仙會兵入援徐州行省穆延烏登赴蔡州起復右丞相致仕薩布代行省事七月癸卯朔曲赦蔡州管內雜犯死罪以下官吏軍民普覃兩官經應辦者更遷一官弛門禁通衆貨蔡人便之乙巳以烏庫哩鎬為御史大夫總帥如故張天綱為御史中丞仍權參政完顏藥師為鎮南軍節度使兼蔡州管內觀察使戊申左右司郎中烏庫哩布希兼息州刺史權元帥右都監行帥府事征行元帥權總帥羅索簽樞密院事己酉選

室女備宮中使令已得數人以右丞呼沙呼諫留識文
義者一人餘聽自便乙卯遣魏璠徵武仙兵丁已護衛
布希舒嚕負祖宗御容至自汴勅有司奉安于乾元寺
前御史大夫富蔡世達西面元帥博斯呼自汴來歸卒
酉武仙劫將士謀取宋金州至浙水衆潰行六部尚書
盧芝侍郎石玠謀歸蔡州仙追芝不及遂殺玠丁卯定
進馬遷賞格又定括馬罪格以簽樞密院事權參政穆
延烏登領其事遣使分詣諸道選兵會于蔡己巳以富

察世達為吏部侍郎權行六部尚書八月癸酉朔以秦
州元帥鈕祜祿烏展權參知政事行省事於陝西諭以
蠟書期九月徵兵與上會于饒風關欲出宋不意以取
興元甲戌大元使王檝諭宋還宋以軍護其行青山招
撫盧進得邏吏言以聞上為之懼丁丑上閱兵于見山
亭癸未元帥楚珩復立壽州於蒙城詔還賞有差州縣
官皆真授乙酉大元召宋兵攻唐州元帥右監軍烏庫
哩黑漢死于戰主帥富察某為部曲兵所食城破宋人

求食人者盡戮之餘無所犯宋人駐兵息州南丙戌詔
權參政穆延烏登簽樞密院事羅索行省院于息州丁
亥烏庫哩鎬權參知政事烏凌阿呼圖為殿前都點檢
庚寅初設四隅機察官壬辰息州行省穆延烏登以兵
襲宋人于中渡店斬獲甚衆乙未萬年節州郡以表來
賀二十餘所辛丑設四隅和羅官及惠民司以太醫數
人更直病人官給以藥仍擇年老進士二人為醫藥官
九月癸卯朔假蔡州都軍致仕內族阿古岱同簽大睦

親府事使宋借糧入辭上諭之曰宋人負朕深矣朕自即位以來戒飭邊將無犯南界邊臣有自請征討者未嘗不切責之向得宋一州隨即付與近淮陰來歸彼多以金幣為贖朕若受財是貨之也付之全城秋毫無犯清口臨陣生獲數千人悉以資糧遣之今乘我疲敝據我壽州誘我鄧州又攻我唐州彼為謀亦淺矣大元滅國四十以及西夏夏亡及於我我亡必及於宋唇亡齒寒自然之理若與我連和所以為我者亦為彼也卿其

以此曉之至宋宋不許戊申魯山元帥元志率兵入援
賜以大信牌升為總帥庚戌以重九拜天子節度使聽
羣臣陪從成禮上面諭之曰國家自開創涵養汝等百
有餘年汝等或以先世立功或以勞効起身被堅執銳
積有年矣今當厄運與朕同患可謂忠矣比聞北兵將
至正汝等立功報國之秋縱死王事不失為忠孝之鬼
往者汝等立功常慮不為朝廷所知今日臨敵朕親見
之矣汝等勉之因賜卮酒酒未竟邏騎馳奏敵兵數百

突至城下將士踴躍咸請一戰上許之是日分軍防守
四面及子城以總帥富珠哩羅索守東面內族承麟副
之參知政事烏庫哩鎬守南面總帥元志副之殿前都
點檢烏凌阿呼圖守西面忠孝軍元帥蔡巴爾副之忠
孝軍元帥權殿前右副點檢王善爾守北面元帥赫舍
哩柏壽副之遙授西安軍節度使兼殿前右衛將軍行
元帥府事鈕祜祿溫綽守東南元帥左都監瓜爾佳當
格副之殿前右衛將軍權左副都點檢內族色埒默守

子城都尉王愛實副之辛亥大元兵築高壘圍蔡城已
未括蔡城粟辛酉禁公私釀酒十月戊寅更造天興寶
會辛巳縱飢民老稚羸疾者出城癸未徐州守臣郭恩
殺官吏以叛行省薩布死之甲申給飢民船聽採城濠
菱芡以食戊子徵諸道兵辛卯上閱射于子城中者賞
麥有差丙申殿前左副都點檢溫都察遜戰歿戊戌賜
義軍戰歿被創者麥十一月辛丑朔以右副都點檢珠
勒根伊實拉為宣差鎮撫都彈壓別設彈壓四員副之

四隅機察亦隸焉宋遣其將江海孟珙帥兵萬人獻糧三十萬石助大元兵攻蔡十二月甲戌盡籍民丁防守括婦人壯健者假男子衣冠運大石上親出撫軍丁丑大元兵決練江宋兵決柴潭入汝水己卯大元兵破外城宿州副總帥高拉格戰歿辛己以總帥富珠哩羅索殿前都點檢烏陵阿呼圖皆權參政都尉完顏承麟為東面元帥權總帥己丑大元兵壻西城上謂侍臣曰我為金紫十年太子十年人主十年自知無大過惡死無

恨矣所恨者祖宗傳祚百年至我而絕與自古荒淫暴
亂之君等為亡國獨此為介介爾又曰古無不亡之國
亡國之君往往為人囚繫或為俘獻或辱於階庭閉之
空谷朕必不至此卿等觀之朕志決矣都尉王愛實戰
歿礮軍總帥王銳殺元帥爪爾佳當格率三十人降大
元庚寅以御用器皿賞戰士甲午上微服率兵夜出東
城謀遁及柵不果戰而還乙未殺尚厯馬五十匹官馬
一百五十匹犒將士

三年正月壬寅冊柴潭神為護國靈應王甲辰以近侍
分守四城戊申夜上集百官傳位于東面元帥承麟承
麟固讓詔曰朕所以付卿者豈得已哉以肌體肥重不
便鞍馬馳突卿平日趨捷有將畧萬一得免祚胤不絕
此朕志也已酉承麟即皇帝位百官稱賀禮畢亟出捍
敵而南面已立宋幟俄頃四面呼聲震天地南面守者
棄門大軍入與城中軍巷戰城中軍不能禦帝自縊于
幽蘭軒未帝退保子城聞帝崩率羣臣入哭諡曰哀宗

哭奠未畢城潰諸禁近舉火焚之奉御經實收哀宗骨
瘞之汝水上末帝為亂兵所害金亡

贊曰金之初興天下莫彊焉太祖太宗威制中國大槩
欲效遼初故事立楚立齊委而去之宋人不競遂失故
物熙宗海陵濟以虐政中原缺望金事幾去天厭南北
之兵挺生世宗以仁易暴休息斯民是故金祚百有餘
年由大定之政有以固結人心乃克爾也章宗志存潤
色而秕政日多誅求無藝民力浸竭明昌承安盛極衰

始至於衛紹紀綱大壞亡徵已見宣宗南渡棄厥本根
外徂餘威連兵宋夏內致困憊自速土崩哀宗之世無
足為者皇元功德日盛天人屬心日出燭息理勢必然
區區生聚圖存於亡力盡乃斃可哀也矣雖然在禮國
君死社稷哀宗無愧焉

金史卷十八

欽定四庫全書

金史卷十九

元中書右丞相總裁托克托等修

本紀第十九

世紀

追尊

景宣皇帝諱宗峻本諱勝額太祖第二子母曰聖穆皇后唐古氏太祖元妃宗峻在諸子中最嫡天輔五年烏赫哩貝勒杲都統諸軍取中京帝別領哈濟明安受金

牌既克中京遂與杲俱襲遼主于鴛鴦濼遼主走陰山
耿守忠救西京帝與宗翰等擊走之西京城南有浮圖
敵先據之下射士卒多傷帝曰先取是則西京可下既
而攻浮圖克之遂下西京太祖崩帝與兄宗幹率宗室
羣臣立太宗天會二年薨熙宗即位追上尊諡曰景宣
皇帝廟號徽宗改葬興陵海陵弒立降熙宗為東昏王
降帝為豐王世宗復尊熙宗廟諡尊帝為景宣皇帝子
哈喇常勝扎拉哈喇是為熙宗

睿宗立德顯仁啟聖廣運文武簡肅皇帝諱宗堯初諱
宗輔本諱鄂爾多大定上尊諡追上今諱魁偉尊嚴人
望而畏之性寬恕好施惠尚誠實太祖征伐四方諸子
皆總戎旅帝常在帷幄天輔六年太祖親征太宗居守
黃龍府安福格誘新降之民以叛帝與烏古鼐討平之
南路軍帥和碩台以賊敗帝往閱實之咸稱平允天會
五年宗望薨帝為右副元帥駐兵燕京十一月分遣諸
將伐宋帝發自河間徇地淄青宋馬括兵二十萬至樂

安帝率師擊破之聞宋主在揚州時東作方興留大軍
夾河屯田而還軍山西二月伊喇古破宋臺宗雋宋忠
軍五萬于大名明日再破之獲宗雋忠而還冀州人乘
夜出兵襲卓哩營卓哩擊敗之宋主奉表請和密書以
誘契丹漢人詔伐宋帝發自河北降滑州取開德府攻
大名府克之河北平初伐宋河北河東諸將議不決或
欲先定河北或欲先平陝西太宗兩用其策而宗翰來
會于濮既平河北遂取東平及徐州盡得宋人江淮運

致金幣在徐州官庫者分給諸軍而劉豫遂以濟南降使巴爾斯等襲宋主于揚州而宋主聞之比巴爾斯至揚州前夕已渡江矣宋主乃貶去帝號再以書來請存社稷語在宗翰傳中既而宗弼追宋主宋主渡江入于杭州復遯入海宗弼乃還於是羅索所下陝西城邑輒叛宗翰等曰前討宋故分西師合于東軍而陝西五路兵力雄勁當併力攻取令達蘭撫定江北宗弼以精兵二萬先往洛陽以八月往陝西或使宗弼遂將以行或

宗輔宗翰宗尹中以一人往上曰羅索往者所向輒辦
今專征陝右豈倦于兵而自愛邪卿等其戮力焉由是
詔帝往是時宋張浚兵取陝西帝至洛水治兵張浚騎
兵六萬步卒十二萬壁富平帝至富平羅索為左翼宗
弼為右翼兩軍並進自日中至于昏暮凡六合戰破之
耀州鳳翔府皆來降遂下涇渭二州敗宋經畧使劉倪
軍于瓦亭原州降薩里罕破德順軍靜邊寨宋涇原路
統制張中孚知鎮戎軍李彥琦以城降宋秦鳳路都統

制吳玠軍于隴州境上招討都監馬五擊走之降一縣而還帝進兵降甘泉等三堡取保川城破宋熙河路副總管軍三萬獲馬千餘拔安西等二寨熙州降分遣左翼都統阿里布右翼都統宗弼招撫城邑之未下者遂得鞏洮河樂西寧蘭廓積石等州定遠和政甘谷寧洮安隴等城寨及鎮堡番漢營部凡四十餘於是涇原熙河兩路皆平薩里罕降慶陽府慕洧以環州降既定陝西五路乃選騎兵六千使薩里罕列屯衝要於是班師

與宗翰俱朝京師立熙宗為安班貝勒帝為左副元帥
十三年行次媯州薨年四十陪葬睿陵追封潞王諡襄
穆皇統六年進冀國王正隆二年追贈太師上柱國改
封許王世宗即位追上尊諡立德顯仁啟聖廣運文武
簡肅皇帝廟號睿宗二年改葬于大房山號景陵

顯宗體道弘仁英文睿德光孝皇帝諱允恭本諱呼塔
噶世宗第二子母曰明德皇后烏凌阿氏皇統六年丙
寅歲生體貌雄偉孝友謹厚大定元年十一月世宗即

位于東京乙酉封楚王置官屬十二月從至中都二年
四月己卯賜名允迪五月壬寅立為皇太子世宗謂之
曰在禮貴嫡所以立卿卿友于兄弟接百官以禮勿以
儲位生驕慢日勉學問非有召命不須侍食帝上表謝
專心學問與諸儒臣講議於承華殿燕閑觀書乙夜忘
倦翼日輒以疑字付儒臣校證九月庚子詔東宮三師
對皇太子稱名少師以降稱臣十一月庚子生辰百官
賀于承華殿世宗賜以襲衣良馬賜宴于仁政殿皇族

百官皆與自後生辰世宗或幸東宮或宴內殿歲以為常十二月辛卯奏曰東宮賀禮親王及一品皇族皆北面拜伏臣但答揖伏望天慈聽臣答拜庶惇親親友愛之道世宗從之以為定制世宗聞儒者鄭松賢松先為同知博州防禦事致仕起為左諭德詔免朝參令輔太子讀書松以友諭自處帝常顧松使取服帶松對曰臣忝諭德不敢奉命帝改容稱善遂益加禮遇每出獵獲鹿輒分賜之四年九月納妃圖克坦氏行親迎禮故事

大駕鹵簿天子乘玉路皇太子鹵簿乘金路六年世宗
行自西京還都禮官不知皇太子自有鹵簿金路乃請
太子就乘大駕綴路行在天子之前上疑其非禮詳閱
舊典禮官始覺其誤於是禮部郎中李邦直員外郎李
山削一階太常少卿武之才太常丞張子羽博士張渠
削兩階頃之禮官議受冊謁謝太廟服常朝服乘馬世
宗曰此與外官禮上後謁諸神廟無異海陵一時率意
行之何足為法大冊與三歲祫享常用古禮為是孔子

曰禮與其奢也寧儉不當輕易如此又曰右丞蘇保衡雖漢人不通經史參政石琚通經史而不言前日禮官既已削奪猶不懼邪其具前代典禮以聞朕將擇而處之久之將授太子冊寶儀注備儀仗告太廟上曰朕受尊號謁謝乃用故宋真宗故事常朝服乘馬皇太子乃用備禮前後不稱甚無謂也謂右丞相良弼左丞守道曰此卿等不用心所致良弼等謝曰臣愚慮不及此上復曰此文臣因循故也是年十月甲申祫享于太廟行

亞獻禮七年帝有疾詔左丞守道侍湯藥徙居瓊林苑
臨芳殿調治八年正月甲戌改賜名允恭庚戌受皇太
子冊寶帝上表謝九年五月世宗命避暑于草濼隋王
永功從行其應從行者皆給道路費帝奏曰遠去闕廷
獨就涼地非臣子所安願罷行世宗曰汝體羸弱山後
高涼故命汝往丁丑百官奉辭于都城之北再拜帝答
拜是月百官承詔具牋問起居六月百官問起居如前
八月乙酉至自草濼百官迎謁于都城之北如送儀丙

戊辰入見世宗曰吾兒相別經夏極甚思憶也九月詔皇太子供膳勿月支歲給五千萬十年八月帝在承華殿經筵太子太保壽王爽啟曰殿下頗未熟本朝語何不屏去左右漢官皆用女直人帝曰諭德贊善及侍從官曷敢輒去爽乃揖而退帝曰宮官四員謂之諭德贊善義可見矣而反欲去之無學故也有使者自山東還帝問民間何所苦使者曰錢難最苦官庫錢滿有露積者而民間無錢以此苦之帝曰貯之空室雖多奚為謂戶

部尚書張仲愈曰天子富藏天下何必獨在府庫也因
奏曰錢在府庫何異銅鑛在野乞流轉使公私俱利世
宗嘉納詔有司議行之十一月丁亥有事於圜丘帝行
亞獻禮十二年五月世宗聞德州防禦使呼喇謀叛因
曰朕於親親之道未嘗不篤而輒敢如此帝徐奏曰叔
呼喇性荒縱耽娛樂而無子嗣忽如此狂謀望更閱實
之十月己未袷享于太廟帝攝行祀事十二年十月承
詔與趙王永中曹王永功獵于保州定州十一月甲午

還京師十四年四月乙亥世宗御垂拱殿帝及諸王侍側世宗論及兄弟妻子之際世宗曰婦言是聽而兄弟相違甚哉帝對曰思齊之詩曰刑于寡妻至于兄弟以御于家邦臣等愚昧願相勵而修之因引棠棣華萼相承脊令急難之義為文見意以誡兄弟焉十五年世宗詔五品職事官謝見皇太子十七年五月甲辰侍宴于常武殿典食令聶赫進粥帝將食有蜘蛛在粥盃中聶赫恐懼失措帝從容曰蜘蛛吐絲乘空忽墮此中爾豈

汝罪哉十月己卯祫享于太廟攝行祀事十九年四月
戊申有事于太廟攝行祀事丁巳詹事烏凌阿愿入謝
帝命取幘頭腰帶官屬請曰此見宰相師傅之禮也帝
曰愿事陛下久以此加敬爾皆曰非臣等所及十一月
改葬明德皇后于坤厚陵帝徒行輓靈車遇大風雪左
右進雨具帝却之比至墳所衣盡霑濕觀者無不下淚
海陵雖貶黜為庶人宗幹尚稱明肅皇帝議者以為未
盡帝具表奏論世宗嘉納之於是宗幹削去帝號降封

遼王二十四年世宗將幸上京詔帝守國作守國之寶以授之其遣使祭享五品以上官及事利害重者遣使馳奏六品以下官其餘常事並聽裁決每三日一次於集賢殿受尚書省啟事京朝官遇朔望具朝服問候車駕在路每二十日一遣使問起居已達上京每三十日一問起居世宗曰今巡幸或能留三二年以汝守國譬之農家種田商人營利但能不墜父業即為克家子也帝對曰臣在東宮二十餘年過失甚多陛下以明德皇

后之故未嘗見責臣誠愚昧不克負荷乞備扈從世宗
曰凡人養子皆望投老得力朕留太尉左右丞參政輔
汝彼皆國家舊人可與商議且政事無難但用心公正
無納讒邪一月之後政事自熟帝流涕堅辭左右為之
感動三月世宗如上京帝守國留中都初帝在東宮或
攜中侍步于芳苑中侍出入禁中未嘗限阻此輩見帝
守國各為得意帝知之謂諸中侍曰我向在東宮不親
國政日與汝輩語話今既守國汝等有召命然後得入

五月世宗至上京賜勅書曰朕以前月八日到遼陽此月二日達上京翌日祀慶元廟省方觀民古之制也汝守國任重夏暑方熾當自愛無貽朕憂帝謂圖克坦克寧曰車駕巡幸以國事見屬刑名最重人之死生繫焉凡有可議當盡至公比主上還都勿有廢事自是凡啟稟刑名帝自披閱召都事委曲折正移晷忘倦或賜之食近侍報瑤池位蓮開當設宴帝曰聖上東巡命我守國何敢宴遊廢事採致數花足矣七月遣子金源郡王

瑪達格奉表問起居請世宗還都十一月壬寅帝冬獵
辛亥還都二十五年正月乙酉免羣臣賀禮帝自守國
深懷謙抑宮臣不庭拜啟事時不侍立免朔望禮京朝
朔望日當具公服問候並停免至是羣臣當賀亦不肯
受甲寅帝如春水二月庚申還都丁卯遣子金源郡王
瑪達格奉表賀萬春節四月久不雨帝親禱即日霑足
六月甲寅帝不豫庚申崩于承華殿世宗自上京還次
天平山好水川訃聞為位臨奠于行宮之南大慟者久

之親王百官皇族命婦及侍衛皆會哭世宗號泣還宮
比至中都為位奠哭者凡七焉世宗以幽王永成為中
都留守來護喪遣滕王府長史再興御院通進額哩埒
來保護金源郡王遣左宣徽使唐古鼎來致祭詔妃圖
克坦氏及諸皇孫喪服並如漢制帝在儲位久恩德在
人者深每日三時哭臨侍衛軍士皆爭入伏哭于承華
殿下聲殷如雷中都百姓市門巷端為位慟哭七月壬
午朔賜諡宣孝太子九月庚寅殯于南園熙春殿己酉

世宗至自上京未入國門先至熙春殿致奠慟哭久之
比葬親臨者六帝事世宗凡巡幸西京涼陘及上陵祭
廟謁衍慶宮田獵觀稼拜天射柳未嘗去左右上有事
于園丘及親享于太廟則行亞獻禮不親祀則攝行祀
事國有大慶則率百官上表賀正旦萬春節則總班上
壽冬十月庚戌朔宰相以下朝見于慶和殿太尉完顏
守道上壽世宗追悼悽愴者久之十一月甲申靈駕發
引世宗路祭于都城之西庚寅葬于大房山世宗欲加

帝號以問羣臣翰林修撰趙可對曰唐高宗追諡太子
弘為孝敬皇帝左丞張汝弼曰此蓋出于武后遂止乃
建廟于衍慶宮後祭用三獻樂用登歌二十六年立子
璟為皇太孫二十九年世宗崩太孫即位是為章宗五
月甲午追諡體道弘仁英文睿德光孝皇帝廟號顯宗
丁酉祔于太廟陵曰裕陵帝天性仁厚不忍刑殺梁檀
兒盜金銀葉憐其母老李福興盜段匹值坤厚陵禮戚
家令巴哩巴盜銀器值萬春節皆委曲全活之失物者

責其償而不加罪聞四方饑饉輒先奏加賑贍因田獵
出巡所過問民間疾苦敬禮大臣友愛兄弟葬明德皇
后于坤厚陵諸妃皆祔自磐寧宮發引趙王永中以其
母輜車先發令張黃蓋者前行帝呼執蓋者不應少府
監張謹言欲奏其事帝止之嘗作重光座銘及刻左右
銘于小玉碑并刻其碑陰皆深有理致最善射而不殫
物嘗奉詔拜陵先獵射一鹿獲之即命罷獵曰足奉祀
事焉用多殺好生蓋其天性云

贊曰遼王杲取中京宗翰宗望皆從景宣別領哈濟明
安哈濟明安者太子之明安也宗翰請立熙宗宗望不
敢違太宗不能拒其義正其理直矣舊史稱睿宗寬恕
好施惠熙宗不終海陵隕斃自時厥後得大位者皆其
子孫有以夫顯宗孝友惇睦在東宮二十五年不聞有
過承意開導四方陰受其賜天不假之年惜哉

金史卷十九

欽定四庫全書

史部

金史卷

二十至
二十二

詳校官國子監祭酒_臣覺羅_臣喜_臣

內閣中書_臣李彤覆勘

總校官舉人_臣章維桓

校對官學錄_臣常_臣循

謄錄監生_臣張彭齡

欽定四庫全書

金史卷二十一

元中書右丞相總裁托克托等修

志第一

天文

自伏羲仰觀俯察黃帝迎日推策重黎序天地堯歷象
日月星辰舜齊七政周武王訪箕子陳洪範協五紀而
觀天之道備矣易曰天垂象見吉凶聖人象之故孔子

因魯史作春秋於日星風雨霜雹雷霆皆書變而不書常所以明天道驗人事也秦漢而下治日患少陰陽愆違天象錯迕無代無之金百有十九年而日食四十二星辰風雨霜雹雷霆之變不知其幾金九主莫賢於世宗二十九年之間猶日食者十有一日珥虹貫者四五然終金之世慶雲環日者三皆見於世宗之世義和之後漢有司馬唐有袁李皆世掌天官故其說詳且六合為一推步之術不見異同金宋角立兩國置厯法有差

殊而日官之選亦有精粗之異今奉詔作金史於志天文各因其舊特以春秋為準云

日薄食輝珥雲氣 太祖天輔三年夏四月丙子朔日食 四年冬十月戊辰朔日食 六年春二月庚寅朔日食 七年秋八月辛巳朔日食

太宗天會七年三月己卯朔日中有黑子九月丙午朔日食 十三年正月丙午朔日食

熙宗天會十四年十一月丙寅日中有黑子斜角交行

天眷三年七月癸卯朔日食

皇統三年十二月癸未朔日食 四年六月辛巳朔日

食 五年六月乙亥朔日食 八年四月戊子朔日食

九年三月癸未朔日食

海陵庶人天德二年正月甲辰日有暈珥白虹貫之十
一月丙戌白虹貫日十二月乙卯慶雲見狀如鸞鳳五
彩 三年正月丁酉白虹貫日

貞元二年五月癸丑朔日食 三年四月丁丑朔昏霧

四塞日無光凡十有七日乃霽五月丁未朔日食

正隆三年三月辛酉朔司天奏日食候之不見海陵勅
自今日食皆面奏不須頒告中外 五年八月丙午朔
日食庚午日中有黑子狀如人 六年二月甲辰朔日
有暈珥戴背十月丙午慶雲見

世宗大定二年正月戊辰朔日食伐鼓用幣命壽王京
代拜行禮為制凡遇日月虧食禁酒樂屠宰一日 三
年六月庚申朔日食上不視朝命官代拜有司不治務

過時乃罷後為常 四年六月甲寅朔日食 七年四

月戊辰朔日食上避正殿減膳伐鼓應天門內百官各
於本司庭立明復乃止閏七月己卯午刻慶雲環日八
月辛亥午刻慶雲環日 九年八月甲申朔有司奏日

當食以雨不見為近奉安太社乃伐鼓于社用幣于應
天門內 十三年五月壬辰朔日食 十四年十一月

甲申朔日食 十六年三月丙午朔日食 十七年九

月丁酉朔日食 二十三年十月己未慶雲見於日側

十一月壬戌朔日食 二十八年八月甲子朔日食

二十九年正月乙卯己初日有暈左右有珥上有背氣
兩重其色青赤而厚復有白虹貫之亘天其東有戟氣
長四尺餘五刻而散丁巳己初刻有兩珥上有背氣兩
重其色青赤而淡頃之背氣於日上為冠已而俱散二
月辛酉朔日食甲子辰刻日上有重暈兩珥抱而復背
背而復抱凡三四次乙丑日暈兩珥有負氣承氣而白
虹亘天左右有戟氣

章宗明昌三年十二月丙辰北方微有赤氣 四年九月癸未日上有抱氣二戴氣一俱相連左右有珥其色鮮明 六年三月丙戌朔日食

承安三年正月己亥朔日食陰雲不見 五年十一月

癸丑日食

宋史作六月乙酉朔

泰和二年五月甲辰朔日食 三年十月戊戌日將沒色赤如赭甲辰申酉間天色赤夜將旦復然 四年三月丁卯日昏無光 五年九月戊子戌時西北方黑雲

間有赤氣如火次及西南正南東南方皆赤中有白氣貫徹乍隱乍見既而為雨隨作風至二更初黑雲間赤氣復起於西北方及正西正東東北往來遊曳內有白氣數道時復出沒其赤氣又滿中天約四更皆散六年正月北京申龍山縣西見有雲結成車牛行帳之狀或如前後摧損之勢晡時乃散二月壬子朔日食七月癸巳申刻日上有背氣一內赤外青須臾散九月乙酉夜將曙北方有赤白氣數道歷王良下徐行至北斗開

陽搖光之東而散 八年四月癸卯巳刻日暈二重內
黃外赤移時而散

衛紹王大安元年四月壬申北方有黑氣如大道東西
竟天至五更散十二月辛酉朔日食 三年三月辛酉
辰刻北方有黑氣如堤內有白氣三似龍虎之狀十月
己卯東北西北每至初更如月將出之狀明至夜半而
滅經月乃已

宣宗貞祐元年十月丙午夜有白氣三衝紫微而不貫

十二月丙申白氣東西竟天移時散 二年九月壬戌朔日食大星皆見 三年正月壬戌日有左右珥上有冠氣移刻散二月丁巳日初出赤如血將沒復然六月戊申夜有黑氣廣如大路自東南至於西北其長竟天四年二月甲申朔日食閏七月壬午朔日食

興定元年七月丙子朔日食 二年七月庚午朔日食三年七月庚申五色雲見十月乙丑平涼府慶雲見遣官驗實以告太廟詔國中 五年正月山東行省蒙

古綱奏慶雲見命圖以進四月丙子日正午有黃暈四
匝其色鮮明五月甲申朔日食六月戊寅日將出有氣
如大道經丑未厯虛危東西不見首尾移時沒十二月
己巳北方有白氣廣三尺餘東西亘天

元光元年十一月丁未東北有赤雲如火 二年五月
辛未日暈不匝而有背氣九月庚子朔日食

哀宗正大二年正月甲申有黃黑祲 三年三月庚午
省前有氣微黃自東北亘西南其狀如虹中有白物十

餘往來飛翔又有光條見如二星移時方滅 四年十一月乙未日上有虹背而向外者二約長丈餘兩旁俱有白虹貫之是年六月丙辰有白氣經天或云太白入井 五年十二月庚子朔日食 八年三月庚戌酉正日忽白而失色乍明乍暗左右有氣似日而無光與日相凌而日光四出搖盪至沒

天興元年正月壬午朔日有兩珥 三年正月己酉日大赤無光京索之間雨血十餘里是日蔡城陷金亡

月五星凌犯及星變 太宗天會七年十一月甲寅天
旗明河鼓直 十年閏四月丙申熒惑入氐八月辛亥
彗星出於文昌 十一年五月乙丑月忽失行而南頃
之復故七月己巳昏有大星隕于東南如散火十二月
丙戌月食昴

熙宗天會十三年十一月乙酉月食命有司用弊以救
著為令 十四年正月辛巳太白晝見凡四十餘日伏
壬辰熒惑入月三月丁酉夜中星搖九月癸未有星大

如缶起西南流于正西十一月己巳狼星搖十五年
正月戊辰歲星犯積尸氣

天眷二年三月辛巳朔歲星留逆在太微五月戊子太
白晝見八月丁丑太白晝見九月辛巳犯軒轅左星乙
巳犯左執法十一月戊寅入氐三年七月壬戌月犯
畢十二月壬午掩東井東轅南第一星

皇統元年二月甲戌月掩畢大星二年十一月己酉
月犯軒轅大星甲寅月犯氐東北星三年正月己丑

熒惑逆犯軒轅次北一星二月乙丑月犯畢大星閏四月癸巳月掩軒轅左角星八月丙申老人星見九月丁丑月犯軒轅大星四年八月癸未熒惑入輿鬼五

年四月丙申彗星見於西北長丈餘至五月壬戌始滅甲辰熒惑犯左執法六年九月戊寅熒惑犯西垣上

將己丑月犯軒轅第二星七年正月辛未彗星出東

方長丈餘凡十五日滅丁亥太白經天七月己巳太白

經天庚辰熒惑犯房第二星十一月壬戌歲星逆犯井

東扇第二星 八年閏八月丙子熒惑入太微垣十月
甲申太白晝見十一月壬辰經天十二月丙寅太白晝
見 九年二月癸亥月掩軒轅第二星七月甲辰太白
辰星歲星合于張丁未熒惑犯南斗第四星八月壬子
又歷南斗第三星

海陵天德元年十二月甲子土犯東井東星 二年正
月乙酉月犯昴壬辰犯木乙未犯角二月丙寅犯心大
星九月乙亥太白晝見至明年正月辛卯後不見丁酉

月犯軒轅左角十月乙丑犯太微上將十二月癸丑犯
昂 三年二月丙辰月食十月丁亥月犯軒轅左角

四年正月癸卯太白經天二月乙亥月掩鬼犯鎮星五
月己亥太白經天丁巳又經天六月癸巳太白犯井東
第二星八月辛未太白犯軒轅大星十一月甲辰熒惑
犯鉤鈴丙午月犯井北第一星十二月乙卯朔太白經
天丙子月食閏月己亥太白經天

貞元元年正月辛丑月犯井東第一星四月戊寅有星

如杯自氐入于天市其光燭地十二月乙卯太白經天
庚午月食閏月乙酉太白經天 二年正月庚申太白
經天是夜月掩昴二月辛丑犯心前星三月辛巳月食
七月癸丑太白晝見凡三十有三日伏八月戊戌熒惑
入井凡十一日而出十一月甲子月食 三年八月乙
酉月犯牛九月辛亥犯建星十一月戊午掩井鉞星
正隆二年正月庚辰太白晝見凡六十七日伏 三年
正月丁亥有流星如杯長二丈餘其光燭地出太微沒

於梗河之北二月己卯熒惑入鬼辛巳月食甲午月掩
歲星六月丁酉犯氐九月己未太白經天至明年正月
二十一日不見十二月戊申月入氐 四年九月壬寅
月掩軒轅右角十一月壬辰入畢犯大星十二月太白
晝見凡七日 五年正月海陵問司天提點馬貴中曰
朕欲自將伐宋天道如何貴中對曰去年十月甲戌熒
惑順入太微至屏星留退西出占書熒惑常以十月入
太微庭受制出伺無道之國又去年十二月太白晝見

經天占為兵喪為不臣為更主又主有兵兵罷無兵兵
起甲午月食二月丁卯太白晝見四月甲戌復見凡百
六十有九日乃伏六年七月乙酉月食九月丙申太
白晝見先是海陵問司天馬貴中曰近日天道何如貴
中曰前年八月二十九日太白入太微右掖門九月二
日至端門九日至左掖門出竝歷左右執法太微為天
子南宮太白兵將之象其占兵入天子之庭海陵曰今
將征伐而兵將出入太微正其事也貴中又言當端門

金史卷之八
而出其占為受制歷左右執法為受事此當有出使者
或為兵或為賊海陵曰兵興之際小賊固不能無也是
歲海陵南伐遇弑

世宗大定元年十月丙午熒惑入太微垣在上將東丁
巳月犯井西扇北第二星二年正月癸巳太白晝見
閏二月戊寅月掩軒轅大星三月戊申掩太微東藩南
第一星八月乙酉犯井西扇北第二星九月庚戌犯畢
距星十月戊辰有大星如太白起室壁間沒於羽林軍

尾跡長丈餘 三年正月庚子太白晝見凡百有十日
乃伏五月辛丑月入氐七月庚戌太白晝見百二十有
七日乃伏八月丁未月犯井距星丙寅太白晝見經天
十月庚辰月犯太微垣西上將星十一月庚寅太白晝
見經天歲星入氐凡二十四日伏壬子月入氐 四年
正月戊子熒惑歲星同居氐己丑熒惑出氐二月壬午
歲星退入氐凡二十九日九月丙午月犯軒轅大星北
次星十一月丙申月食既十二月辛卯太白晝見經天

癸卯月掩房北第一星 五年正月癸亥月掩軒轅大
星北次星八月丁酉犯井東扇第一星十一月癸丑熒
惑入氐凡二十一日 六年二月丙申月犯南斗東南
第二星三月己未入氐四月辛丑太白晝見八十有八
日伏六月太白晝見辛巳經天九月壬子太白晝見百
有三日乃伏丙辰經天十月壬辰復晝見經天十一月
辛亥金入氐凡七日庚申太白晝見經天十二月戊子
復見經天癸巳月犯房北第二星 七年十月乙巳火

入氏凡四日十一月壬申太白晝見九十有一日伏丁丑歲星晝見二日八年正月癸未月掩心大星三月庚午掩軒轅大星北一星己丑大白晝見百五十有八日乃伏五月丁卯歲星晝見八月甲午太白犯軒轅大星十月庚子月掩熒惑十一月庚午犯昴九年正月戊寅月掩心後星四月庚子掩心前星八月癸卯掩昴十二月丙戌犯土丁酉太白晝見十有六日伏十年正月丙寅月掩軒轅大星七月庚子犯五車東南星八

月戊申朔木星掩熒惑在參畢間 十一年二月壬戌
熒惑犯井東扇北第一星八月癸卯太白晝見 十二
年五月辛巳月犯心後星八月癸卯犯心大星辛亥熒
惑掩井東扇北第二星丁亥太白晝見在日前九十有
八日伏十月己酉熒惑掩鬼西北星歲星晝見在日後
四十有七日伏 十三年閏正月辛酉太白晝見四十
有九日伏二月己丑熒惑犯鬼西北星三月癸巳朔入
鬼次日犯積尸氣六月辛未月犯心前星十月乙丑歲

星晝見於日後五十有三日伏 十四年三月辛丑太白歲星晝見十有八日伏丙辰二星經天凡二日六月己未太白晝見三十有九日八月己卯晝見又百三十二日乃伏庚辰熒惑犯積尸氣十月丙寅歲星晝見六日十一月甲子太白晝見八十有六日伏十二月乙丑月掩井西扇北第一星 十六年三月庚申月食五月甲寅太白晝見五十有四日伏庚午月掩太白七月丁未犯角宿距星甲子掩畢宿距星八月丙子太白犯軒

轅大星九月丁巳月食十月丁丑熒惑入太微十一月
甲寅月掩畢距星戊辰熒惑犯太微上將十二月己丑
月掩太微左執法 十七年春正月丙寅熒惑犯太微
西藩上相九月庚戌歲星熒惑太白聚於尾十二月己
巳太白晝見四十有四日伏 十八年七月庚辰土星
犯井東扇北第二星九月己丑熒惑犯左執法十二月
甲午鎮星掩井西扇北第一星凡十日 十九年正月
甲戌月食既三月甲戌熒惑犯氐距星四月丁巳歲星

晝見凡七日七月丙子太白晝見四十有五日伏八月
癸卯犯軒轅御女辛亥熒惑掩南斗杓第二星九月壬
申月掩畢大星十一月辛未熒惑掩歲星十二月丁亥
月犯歲星二十年二月己丑月掩畢大星三月丙辰
掩畢西第二星二十一年二月戊子月犯鎮星戊戌
太白晝見二月甲子太白晝見四月壬申熒惑掩斗魁
第二星十有四日六月甲戌客星見于華蓋凡百五十
有六日滅七月乙亥朔熒惑順入斗魁中五日

以下史

闕

二十二年五月甲申太白晝見六十有四日伏七月戊子歲星晝見二日八月戊辰太白晝見百二十有八日其經天者六十四日十一月辛未熒惑行氐中乙亥太白入氐辛巳夜月食既癸未熒惑太白皆出氐中十二月戊戌熒惑犯鈎鈴二十三年五月己卯月食既九月甲申歲星晝見五十有五伏十月辛酉太白晝見百四十有九日乃伏十一月丁卯歲星晝見三十有三日伏閏十一月庚申歲星晝見九十日伏二十

四年四月己未朔太白晝見百四十有五
日乃伏甲申月掩太白九月庚子歲星犯
軒轅大星甲辰晝見凡五十二日伏十月
壬申太白辰星同度二十五年三月乙酉
太白與月相犯九月丁亥月在丁魁中犯
西第五星十一月庚辰朔歲星晝見在日
後凡七十四日壬午太白晝見在日後百
十有一日乃伏十二月己未月犯熒惑甲
子太白晝見經天二十六年三月丙戌熒
惑入井鎮星犯太微東藩上相壬辰月食
四月丁丑熒惑

犯鬼西南星七月丙申月掩心前大星又犯于朔日月
五星會于軫十二月乙未月掩心前大星又犯于後星
二十七年五月壬子月犯心大星六月庚辰太白晝
見百七十有三日乃伏癸巳月掩昴七月丙午犯房南
第一星是日太白晝見經天十月己丑太白入氐十二
月丁丑月掩昴 二十八年正月己未歲星留於房甲
子守房北第一星十一月丙申鎮星入氐庚子太白晝
見在日前四十有九日伏十二月壬申月掩昴 二十

九年正月丁酉土星留氐中三十有七日逆行後七十
九日出氐五月庚寅朔太白晝見在日後六月丙辰月
犯太白月北星南同在柳宿十一月己未熒惑守軒轅
至戊辰退行其色稍怒十二月辛丑月食既

章宗明昌元年二月丁亥太白晝見六月丁酉月食既
十二月乙未月食 二年六月壬辰月食十一月乙丑
金木二星見在日前十三日方伏而順行危宿在羽林
軍上壘壁陣下光芒明大十二月戊子木金相犯有光

芒 三年三月戊戌熒惑順行犯太微西藩上將四月
丁巳月食己未熒惑掩右執法色怒而稍赤 四年正
月丙子月有暈白虹貫其中八月己亥卯初三刻歲星
見未正二刻太白見俱在午位其夜歲星留胃十三度
守天廩九月戊申月食 五年十月癸卯月食十一月
癸丑太白晝見在日前三十有三日伏 六年正月庚
寅太白晝見在日前百有二日乃伏六月庚辰復晝見
在日後百六十七日唯是日經天

承安元年四月司天奏河津星象事上諭宰相曰天道
不測當預防之八月壬戌月食九月壬午太白晝見在
日前百有七日乃伏二年二月丁巳太白晝見在日
後百九十有五日後乃伏己未經天是夜月食既三年
正月甲寅月食七月庚戌月食五年五月庚午月食
六月庚戌月掩太白

泰和元年十一月辛酉月食二年五月己未月食
三年三月癸未月食六月戊戌太白晝見在日後百有

十日乃伏 四年九月乙亥月食 五年三月壬申月
食八月己巳月食 六年五月甲申太白晝見在日前
七十有六日庚戌經天六月辛未歲星晝見在日後七
月戊申經天八月癸卯月暈圍太白熒惑二星辛亥歲
星辰見至夜五更與東井距星相去七寸內癸丑夜半
有流星如太白其色赤起於婁宿己未卯正初刻太白
晝見在日前其夜五更熒惑與輿鬼積尸氣相犯在七
寸內庚申卯正初刻太白晝見在日後其夜五更初熒

惑在輿鬼積尸氣中壬申太白晝見經天在日後十月
丙午歲星犯東井距星十一月壬午太白入氐 七年
正月丙戌初更月有暈圍歲鎮二星在參畢間辛卯月
食三月癸丑月掩軒轅大星七月戊子月食九月己卯
初更月在南斗魁中旦歲星在輿鬼中 八年正月丙
戌月食七月戊戌朔太白晝見在日後八月壬戌太白
歲星光芒相及同在張一度十一月庚子未刻有流星
如太白者二光芒如炬幾一丈起東北沒東南

衛紹王大安元年正月辛丑有飛星如火起天市垣尾
跡如赤龍之狀移刻散二月乙丑朔太白晝見經天六
月丁丑月食十月乙丑月食熒惑丙寅歲星犯左執法
二年正月庚戌朔日中有流星出大如盆其色碧西
行漸如車輪尾長數丈没于濁中至地復起光散如火
移刻滅二月客星入紫微中其光散如赤龍之狀 三
年正月乙酉熒惑入氐中凡十有一日乃出二月熒惑
犯房閏月犯鍵閉星十月癸巳犯壘壁陣

崇慶元年春三月日正午日月太白皆相去咫尺

宣宗貞祐元年十一月丙子熒惑入壘壁陣二年二

月庚戌月食八月丁未月食九月丁亥太白晝見於軫

十一月庚辰鎮星犯太微東垣上相辛巳熒惑犯房鉤

鈴三年七月庚申有流星如太白其色青白有尾出

紫微垣北極之旁入貫索中己卯月入畢至戊夜犯畢

大星八月辛丑月食既十二月庚寅太白晝見於危八

十有五伏四年正月乙卯夜中天有流星大如日

色赤長丈餘墜於西南其聲如雷二月己亥月食四月
丁酉太白晝見於奎百九十有六日乃伏六月丙申歲
星晝見於奎百有一日乃伏閏七月乙未月食辛丑犯
畢十一月丙戌月暈歲星歲在奎月在壁己丑犯畢大
星十二月戊午復犯畢大星

興定元年正月乙酉月犯畢左股第二星四月戊辰太
白晝見於井百六十有二日乃伏八月戊申歲星晝見
於昴六十有七日伏九月癸巳月犯東井西扇第二星

十月癸丑夜有流星大如杯尾長丈餘自軒轅起貫太
微沒於角宿之上十一月癸未月暈歲星熒惑二星木
在胃火在昴丙戌太白晝見十二月戊午月食二年
六月乙卯月食八月壬戌有流星大如杯尾長丈餘其
光燭地起建星沒尾中一云自東北至西南而墜其光
如塔狀先有聲如風後若雷者三牕紙皆震十月庚申
月犯軒轅左角之少民星十一月壬子月食既三年
五月庚戌月食既壬子太白晝見於參三十有六日經

天又百八十四日乃伏七月壬寅初昏自西南來其光燭地狀如月而稍不圓色青白有小星千百無數環之若迸火然墜於東北少頃有聲如鼓八月丁卯歲星犯輿鬼東南星己巳歲星晝見於柳百有九日乃伏十一月乙巳月食癸丑白虹二夾月尋復貫之四年正月庚子月犯東井三月甲寅歲星犯鬼積尸氣五月甲辰月食六月戊辰歲星晝見于太白晝見於張百八十有四日乃伏十一月壬辰歲星晝見于翼六十有七日夜

又犯靈臺北第一星 五年正月辛丑太白晝見於牛
二百三十有二日乃伏司天瓜爾佳德玉等奏以為臣
強之象請祭以禳之宣宗曰斗牛吳分蓋宋境也他國
有災吾禳之可乎九月庚戌歲星犯左執法閏十二月
戊子熒惑犯軒轅甲午月犯熒惑戊戌鎮星晝見于軫
己亥太白晝見於室 六年正月辛酉月犯熒惑壬戌
犯軒轅三月壬子月食太白四月癸亥月食丙寅歲星
犯太微左執法七月乙亥太白經天與日爭光八月己

卯彗星出於亢宿右攝提周鼎之間指大角太史奏除舊布新之象宜改元修政以消天變於是改是年為元光元年九月丁未減壬申月食歲星

元光二年八月乙亥熒惑入輿鬼掩積尸氣十月壬午犯靈臺十一月又犯心大星

哀宗正大元年正月丙午月犯昴三月癸丑犯熒惑是月熒惑逆行犯左執法四月癸酉熒惑犯右執法乙未太白辰星相犯三年十一月丙辰月掩熒惑丁巳熒

惑犯歲星庚申犯壘壁陣癸酉五星並見於西南十二月
月熒惑入月 四年正月壬戌熒惑犯太白六月丙辰
太白入井七月丁亥熒惑犯斗從西第二星 五年五
月乙酉月掩心大星 七年十月己巳月暈至五更復
有大連環貫之絡北斗內有戟氣十二月庚寅有星出
天津下大如鎮星而色不明初犯輦道二日見於東北
在織女南乙未入天市垣戊申方出癸丑厯房北復東
南行入積薪凡二十五日而滅

天興元年七月乙巳太白歲星熒惑太陰俱會於軫翼
司天武元極言天變上惟歎息竟亦不之罪也八月甲
戌太白歲星交閏九月己酉彗星見東方色白長丈餘
彎曲如象牙出角軫南行至十二日長二丈十六日月
燭不見二十七日五更復出東南約長四丈餘至十月
一日始滅凡四十有八日司天奏其咎在北宸宗曰我
亦北人今日之事我當滅也何乃不先不後適丁此乎

金史卷二十